

四庫全書

史部

欽定四庫全書

史部

欽定續通典卷三十二
四

詳校官監察御史_臣曹錫寶

洗馬_臣王坦修覆勘

校對官編修_臣蔡廷衡

謄錄舉人_臣李堂

續定四庫全書

續定續通典卷三十二

職官

武官上

將軍總敘

唐肅宗至德以後十六衛及六軍

左右龍武左右神武左右神策號為六軍

大將軍將軍員數無所改置

已詳杜佑通典

宋左右金吾衛左

右衛左右驍衛左右武衛左右屯衛左右衛官軍衛左

右監門衛左右千牛衛俱有上將軍大將軍將軍為環衛官無定員名雖沿唐制而別無所領其禁軍皆隸三

衙殿前司及侍衛馬軍步軍二司為三衙其驃騎輔國鎮國冠軍懷化五

大將軍雲麾歸德忠武壯武宣威明威定遠寧遠遊騎遊擊十將軍皆為武散官遼北面官北大王院詳袞司有北院將軍北院小將軍南大王院有南院將軍南院小將軍近侍詳袞司有近侍將軍近侍小將軍宿直司有宿直將軍宿直小將軍四帳都詳袞司有將軍小將

軍錫里司有錫里將軍錫里小將軍約尼紇詳袞司有
約尼紇將軍約尼紇小將軍國舅伊蘇濟勒翁帳詳袞
司有國舅本族將軍國舅本族小將軍部族詳袞司有
部族將軍部族小將軍大詳袞司有將軍小將軍大將
軍府有大將軍小將軍將軍小將軍西南路巡察司有
西南路巡察將軍其屬國有某國將軍某國小將軍遼
制將軍本非崇秩位多在詳袞都監之下惟大將軍府
各統所治軍之政令故以大將軍統之而小將軍及將

軍小將軍屬焉其南面官各衛亦有大將軍上將軍將軍金制置殿前都點檢有左右衛將軍副將軍宿直將軍侍衛將軍其左右屯衛將軍左右領軍衛大將軍千牛將軍殿前侍御衛大將軍專值扈從其龍虎衛金吾衛驃騎衛三上將軍奉國輔國鎮國三上將軍昭武昭毅昭勇安遠定遠懷遠六大將軍廣威宣威明威信武顯武宣武武節武德武義武略十將軍皆為武臣散官章宗泰和六年伐宋權設平南撫軍上將軍平南冠軍

大將軍平南龍驤將軍平南虎威將軍平南盪江將軍
軍還即罷元監門大將軍將軍武衛將軍左右衛大將
軍將軍金吾大將軍將軍羽林將軍殿前將軍領軍將
軍夾輅將軍皆扈從官殿內將軍殿外將軍宿直將軍
皆執事官其龍虎衛金吾衛驃騎衛奉國輔國鎮國六
上將軍昭武昭勇昭毅安遠定遠懷遠六大將軍廣威
宣威明威信武顯武宣武武節武德武義武略十將軍亦為
武臣散官明太祖洪武中命徐達為大將軍有節鉞其

後總兵掛印稱將軍者雲南曰征南將軍大同曰征西
前將軍湖廣曰平蠻將軍兩廣曰征蠻將軍遼東曰征
東前將軍宣府曰鎮朔將軍甘肅曰平羌將軍寧夏曰
征西將軍交趾曰副將軍延綏曰鎮西將軍又各總兵
官下有遊擊將軍京營有佐擊將軍其驃騎金吾龍虎
鎮國定國奉國昭勇昭毅昭武懷遠定遠安遠明威宣
威廣威宣武顯武信武武德武節武略武毅各將軍皆
武臣散階之職無所職掌

左右衛 并親衛

唐制左右衛上將軍各一人大將軍各一人將軍各三人掌宮禁宿衛凡五府三衛及折衝驍騎番上者受其名簿而配以職皇帝御正殿則守諸門及內廂宿衛仗非上日亦將軍一人押仗將軍缺以中郎將代將軍掌武上將軍之事宋左右衛亦有上將軍大將軍為環衛官無定員皆命宗室為之亦為武臣之贈典大將軍以下又為武臣責降散官徽宗政和中改武臣官制而環

衛如故蓋雖有四十八階別無所領故也宋制禁兵分隸殿前及侍衛兩司所稱十二衛將軍皆空官無實高宗時多不除授孝宗隆興中始命學士洪遵等討論典故復置十六衛號環衛官以承宣使領左右衛上將軍在內則兼帶在外則不帶正任為上將軍遙郡為大將軍正親兄弟子孫試充又詔祖宗諸后自明肅至欽慈諸后及后妃嬪御之家各具本宗堪充諸衛官以名衛聞其殿前司有都指揮使副都指揮使都虞候各一人

掌殿前諸班直及步騎諸指揮之名籍凡統制訓練番
衛戍守遷補賞罰皆總其政令而有都檢點副都檢點
之名在都指揮之上後不復置入則侍衛殿陛出則扈
從乘輿大禮則提點編排整肅禁衛鹵簿儀仗掌宿衛
之事都指揮使以節度使為之副都指揮使都虞候以
刺史以上充資序淺則主管本司公事馬步軍亦如之
備則通治闕則互攝其騎軍有殿前指揮使內直散員
散指揮散都頭散祗候金鎗班東西班散直鈞容直及

捧日以下諸軍指揮步軍有御龍直骨朶子直弓箭直
弩直及天武以下諸軍指揮其諸班有都虞候指揮使
都軍使都知副都知押班其御龍諸直有四直都虞候
本直各有都虞候指揮使副指揮使都頭副都頭十將
將虞候騎軍步軍有捧日天武左右四廂都指揮使捧
日天武左右廂各有都指揮使每軍有都指揮使都虞
候每指揮有指揮使副指揮使每都有軍使副兵馬使
十將將虞候承局押官各以其職隸於殿前司渡江後

都指揮間虛不除則以主管殿前司一員任其事專掌諸班直禁旅扈衛之事捧日天武四廂隸焉宿衛親兵並聽節制其下有統制統領將佐等分任其事初渡江時制多草創各衛之制未備稍稍招集填置三帥資淺者各有主管某司公事之稱又別置御營司擢王淵為都統制其後外州駐劄又有御前諸軍都統制之名又併入神武軍以舊統制統領改充殿前統制統領官淳熙以後四廂之職多虛而殿前職司有權管幹有時暫照

管之號愈非乾道以前之比矣其侍衛親軍馬軍及步軍各有都指揮使副都指揮使都虞候各一人各掌其本軍諸指揮之名籍凡統制訓練番衛戍守遷補賞罰皆總其政令侍衛扈從及大禮宿衛所掌如殿前司馬軍自寵衛而下有左右四廂都指揮龍衛左右廂各有都指揮使每軍有都指揮使都虞候每指揮有指揮使副指揮使每都有軍使副兵馬使十將將虞候承局押官各以其職隸於馬軍司高宗建炎已後復置主管侍

衛馬軍司一人掌出入扈衛守宿之事步軍自神衛左右四廂而下其設官及職掌與馬軍同建炎後復置主管侍衛步軍司一人所掌與侍衛馬軍司同遼北面官侍衛司掌御帳親衛之事有侍衛太師侍衛太保侍衛司徒侍衛司空侍衛北護衛府掌北院護衛之事有北護衛太師北護衛太保北護衛司徒總領護衛司有總領左右護衛左護衛司有左護衛太保左護衛右護衛司有右護衛太保右護衛其南護衛司設官亦如之宿

衛司專掌宿衛之事有總宿衛事亦曰典宿衛事總知宿衛事同掌宿衛事宿衛官禁衛局有總禁衛事禁衛長宿直司掌輪直官員宿直之事有宿直詳衮宿直都監宿直將軍宿直小將軍宿直官宿直護衛皆為北面御帳官南面官有左右衛大將軍

聖宗開泰七年皇子宗簡為右衛大將軍

上將軍金殿前左衛將軍副將軍殿前右衛將軍副將軍掌宮禁及行從宿衛警嚴仍總領護衛又有左右宿直將軍掌總領親軍皆隸殿前都點檢司其殿前都點

檢兼侍衛將軍都指揮使掌行從宿衛關防門禁督攝
隊伍總判司事殿前左副都點檢兼侍衛將軍副都指
揮使右副都點檢同專掌宮掖及行從元世祖至元八
年改侍衛為右衛掌宿衛扈從及屯田

凡屯田各官詳見諸卿司農寺

國有大事則調度之二十年置都指揮使一人副都指
揮使一人二十一年置僉事二人成宗大德十一年已
後增省不一後定置都指揮使二人副都指揮使二人
僉事二人在衛中衛官職省置略與左衛同前衛後衛

置於至元十六年設官與左衛同又置右阿蘇衛親軍
都指揮使司掌宿衛城禁置達嚕噶齊一人都指揮使
三人副都指揮使二人僉事二人其屬有經歷知事承
發架閣照磨等官其左阿蘇衛親軍都指揮使司設官
職掌與右阿蘇衛同皆隸樞密院其左右衛大將軍將
軍皆為扈從執事之官明京衛指揮使司指揮使一人
指揮同知二人指揮僉事四人鎮撫司鎮撫二人其番
直宿衛名親軍者二十有六曰錦衣衛

主巡察緝捕理
詔獄以都督都

指揮領之蓋特異於諸衛焉

曰旗手衛曰金吾前衛曰金吾後衛曰

羽林左衛曰羽林右衛曰府軍衛曰府軍左衛曰府軍

右衛曰府軍前衛曰府軍後衛曰虎賁左衛

是為上十二衛太祖

洪武中置曰金吾左衛曰金吾右衛曰羽林前衛曰燕山左

衛曰燕山右衛曰燕山前衛曰大興左衛曰濟陽衛曰

濟州衛曰通州衛

是為上十衛成祖永樂中置

曰騰驤左衛曰騰驤

右衛曰武驤左衛曰武驤右衛

宣宗宣德八年置

因舊上宿衛

故名親軍不隸五都督府其京衛隸都督府者三十有

三曰留守左衛曰鎮南衛曰驍騎右衛曰龍虎衛曰瀋陽左衛曰瀋陽右衛隸左軍都督府曰留守右衛曰虎賁右衛曰武德衛隸右軍都督府曰留守中衛曰神策衛曰應天衛曰和陽衛隸中軍都督府曰留守前衛曰龍驤衛曰豹韜衛隸前軍都督府曰留守後衛曰鷹揚衛曰興武衛曰大寧中衛曰大寧前衛曰會州衛曰富峪衛曰寬河衛曰神武左衛曰忠義右衛曰忠義前衛曰忠義後衛曰義勇右衛曰義勇前衛曰義勇後衛曰

武城中衛曰蔚州左衛隸後軍都督府又京衛非親軍而不隸都督府者十有五曰武功中衛曰武功左衛曰武功右衛隸工部曰永清左衛曰永清右衛曰彭城衛曰長陵衛曰獻陵衛曰景陵衛曰裕陵衛曰茂陵衛曰泰陵衛曰康陵衛曰永陵衛曰昭陵衛

長史唐置一人掌判諸曹五府外府廩祿卒伍軍團之名數器械車馬之多少宋遼金元明皆無之

錄事叅軍唐置一人掌受諸曹及五府外府之事勾稽

抄目印給紙筆宋遼金皆無之元各衛置經歷二人知
事二人照磨二人明諸衛亦有經歷知事吏目各一人
倉曹叅軍唐置二人掌五府文官勲考假使祿俸公廨
田園食料醫藥宋遼金元皆無明諸衛有倉大使副使
各一人

兵曹叅軍唐置二人宋遼金元明皆無

騎曹叅軍唐置一人宋遼金元明皆無

曹曹叅軍唐置一人宋遼金元明皆無

親衛唐置親衛之府一曰親府勲衛之府二曰勲一府
曰勲二府翊衛之府二曰翊一府曰翊二府凡五府每
府中郎將一人左右郎將一人兵曹叅軍事各一人凡
中郎將掌領校尉旅師親衛勲衛之屬宿衛者而總其
府事左右中郎將郎貳馬宋三衛官置郎一人秩比中
大夫中郎為之貳文武各一人秩比朝議大夫博士二
人主簿一人其親衛府郎十人中郎十人親衛官以后
妃嬪御之家有服親及翰林學士并管軍正任觀察使

以上子孫為之勲衛府郎十人中郎十人以勲臣之世
賢德之後有服親大中大夫以上及正任團練使遙郡
觀察使以上子孫為之翊衛府郎二十人中郎二十人
文武各四十人以卿監正任刺史遙郡團練使以上子
孫為之凡三衛郎治其府之事率其屬日直於殿陛長
在左立起居郎之前貳分左右文東武西立都承旨之
後仗退治事於府博士掌教道校試三衛所習文武之
藝親衛立於殿上兩旁勲衛立於朵殿翊衛立於兩階

衛士之前遼南面官亦有親衛勳衛翊衛金元親衛翊衛皆扈從之官明不設

左右驍衛

唐制左右驍衛上將軍各一人大將軍各一人將軍各二人掌同左右衛所置官屬亦與左右衛同宋左右驍衛亦有上將軍大將軍將軍並為環衛官無定員與左右衛將軍同遼南面官亦有左右驍衛大將軍上將軍將軍金元皆無

明諸衛詳載左右衛中

左右武衛

唐制左右武衛上將軍各一人大將軍各一人將軍各二人掌同左右衛所置官屬亦與左右衛同宋左右武衛亦有上將軍大將軍將軍並為環衛官無定員與左右衛將軍同遼南面官亦有左右武衛

聖宗統和十二年加王繼忠左

武衛上將軍

金無之元武衛親軍置都指揮使司至元二十

六年樞密院以六衛六千人大都屯田三千人近路迤南萬戶府一千人總一萬人立武衛設官五員成宗元

貞大德年間累增都指揮使四人武宗至大三年省四人後定置衛官達嚕噶齊一人都指揮使三人副都指揮使二人僉事二人其屬經歷二人知事二人照磨一人屬樞密院其武衛將軍為扈從執事之官

明諸衛詳載左右衛

中

左右威衛

唐制左右威衛上將軍各一人大將軍各一人將軍各二人掌同左右衛所置官屬亦與左右衛同宋無威衛

有屯衛上將軍大將軍將軍亦為環衛官遼南面官有左右威衛金亦無之元左都威衛使司使三人副使二人僉事二人經歷知事照磨各一人其右都威衛設官

與左都威衛同

明諸衛詳載左右衛中

左右領軍衛

唐制左右領軍衛上將軍各一人大將軍各一人將軍各二人掌同左右衛宋無領軍衛有左右衛官軍衛上將軍各一人大將軍各一人將軍各二人為環衛官無

定員與左右衛將軍同遼南面官亦有左右領軍衛金
左右領軍衛大將軍專直扈從元領軍將軍亦專直扈
從明不設

左右金吾衛

唐制左右金吾衛上將軍各一人大將軍各一人將軍
各二人掌宮中京城巡警烽候道路水土之宜其官屬
與左右衛同宋左右金吾衛有上將軍大將軍將軍為
環衛官無職掌往往以節度使領左右金吾衛上將軍

又置皇城司幹當官七人以武功大夫以上及內侍都知押班充掌宮城出入之禁令凡周廬宿衛之事宮門啟閉之節皆隸焉每門給銅符二鉄牌一以時叅驗而啟閉之總親從親事官名籍辨其宿衛之地以均其番直人物僞冒不應法則譏察以聞遠北面官設御帳官

詳見左
右衛

南面官有左右金吾衛金宮城諸門衛禁掌於殿前司左右宿直將軍又置武衛都指揮使司有都指揮使副都指揮使副都判官等官掌防衛都城警捕盜

賊其屬有鈐轄同鈐轄十人都鈐轄四人都將二十人
掌管轄軍人防衛警捕之事其職掌與唐金吾衛同其
金吾衛上將軍為武臣散官元置哈喇婁萬戶府達嚕
噶齊一人萬戶一人掌守禁門等處應直宿衛隸大都
督府其大都留守司亦掌守衛宮闕及門禁關鑰啟閉
之事所屬城門尉凡十有一門每門設尉一人副尉二
人至元二十年置以四集賽巴爾噶齊為之二十四年
復以六衛親軍叅掌上都留守司亦同不設尉其金吾

衛上將軍為武臣散官大將軍將軍為扈從執事官明
洪武三年置留守衛指揮使司專領軍馬守禦各城門
及巡警皇城與城垣造作之事後陞為留守都衛統轄
天策豹韜飛熊鷹揚江陰廣洋橫海龍江水軍左右十
衛八年復為留守衛與天策等八衛俱為親軍指揮使
司並隸大都督府十一年改為留守中衛增置左右前
後四衛仍為親軍十三年始分隸五都督府其金吾羽
林等十九衛亦掌守衛巡警

左右監門衛

唐制左右監門衛上將軍各一人大將軍各一人將軍各二人掌諸門禁衛及門籍文武官九品以上每月送籍於引駕仗及監門衛衛以帳報內門凡朝參奏事待詔官及織扇儀仗出入者閱其數行幸則率屬於衙門監寺宋左右監門衛有上將軍大將軍將軍為環衛官無定員與左右衛將軍同遼南面官亦有左右監門衛金不設元監門大將軍將軍為扈從執事官明無

左右千牛衛

唐制左右千牛衛上將軍各一人大將軍各一人將軍各二人掌侍衛及供御兵仗以千牛備身左右執弓箭宿衛以主仗守戎器朝日領備身左右升殿列侍親射則率屬以從凡御仗之物二百一十有九羽儀之物三百宋左右千牛衛有上將軍大將軍將軍為環衛官無定員與左右衛將軍同又有帶御器械選三班以上武幹親信者佩橐鞬御劍或以內臣為之止名御帶真宗

咸平元年改為帶御器械仁宗景祐二年詔自今無得過五六人慶厯元年詔遇闕員曾歷邊任有功者補之南渡已後諸將在外皆帶職蓋假禁近之名為軍旅之重高宗紹興二十九年詔中外舉薦武臣無闕可處增置帶御器械四人然近侍亦或得之亦唐千牛衛之職也遼南面官有左右千牛衛聖宗太平四年見千牛衛將軍蕭順金直仗之官掌於殿前都點檢司無千牛衛其千牛將軍專直扈從元直仗之官即在五衛

左右前後中五衛詳見左右衛

無千牛衛

明錦衣衛凡朝會巡幸率大漢將軍

共一十五
百七人

侍從扈

行宿衛則分番入直朝日夕月耕藉視牲則服飛魚服
佩繡春刀侍左右其府軍前衛掌統領幼軍輪番帶刀
侍衛又有騰驤等衛掌帥力士直駕隨駕

左右羽林衛

唐制左右羽林軍大將軍各一人將軍各三人掌統北
衙禁兵督攝左右廂飛騎儀仗大朝會則周衛階陛巡
幸則夾馳道為內仗凡飛騎番上者配其職宋禁兵悉

隸殿前及侍衛兩司

詳見左右衛

無羽林衛遼南面官有左

右羽林軍金不設元羽林將軍為扈從執事官明無

左右龍武軍

左右神武等軍附

唐制左右龍武軍大將軍各一人統軍各一人將軍三人
德宗興元元年六軍各置統軍貞元元年增將軍一人
其掌同羽林左右神武軍大將軍各一人統軍各一人
將軍三人總衙前射生兵左右神策軍大將軍各一人
統軍各二人將軍三人掌衛兵及內外八鎮兵昭宗

天復三年廢神策軍四年復置宋親軍皆隸侍衛二司

詳見左
右衛

遼南面官有左右龍虎軍左右神武軍左右神

策軍左右神威軍金龍虎衛上將軍為武臣散官元龍
虎衛上將軍亦為武臣散官明龍虎將軍亦武臣之散
階無專職

欽定續通典卷三十二

欽定四庫全書

欽定續通典卷三十三

職官

武官下

大將軍

并官屬

唐制十六衛皆有大將軍

五見十六衛

其左右衛左右驍衛

左右武衛左右威衛左右領軍衛左右金吾衛左右監門衛左右千牛衛左右羽林軍各大將軍皆正三品左

右龍武軍左右神武軍左右神策軍各大將軍皆正二品已非漢魏晉宋北齊時之崇秩矣其驃騎輔國鎮軍冠軍懷化歸德六大將軍為武臣散階無所職掌宋左右金吾衛左右衛左右驍衛左右武衛左右屯衛左右衛官軍衛左右監門衛左右千牛衛各有大將軍

互見十六

衛在上將軍之下為環衛官無定員皆空官無實故南

渡初多不除授孝宗復置十六衛設大將軍等官

具左右衛

篇其驃騎等五大將軍

具總敘篇

皆為武臣散階遼北面官

將軍本非要職建置較前代獨多唯大將軍府統所治
軍之政有大將軍以領之其五押招討司亦有大將軍
視各詳察司之將軍為較重焉南面官各衛俱有大將

軍

互見十六衛

在上將軍之上金殿前侍御衛大將軍僅為

儀衛扈從之官其昭武等六大將軍

具總叙篇

亦為武臣散

階并非武階之崇職章宗泰和六年置平南冠軍大將
軍暫設即罷元監門及左右衛金吾三大將軍亦係儀
衛扈從官其昭武等六大將軍階秩與金同明初命徐

達為大將軍授節鉞訖出勒所部建牙鳴鼓角正行列
擊節鉞鼓吹前導百官以次送其時大將軍任重職專

儀亦極盛他如常遇春等不過稱副將軍焉

時徐達為大將軍遣

人自軍中請事上勞之曰將軍忠義出於天性雖古豪傑之士不能過今所請事悉欲稟命而行此賢臣事君之道所請事多可行後成國公朱能征安南亦為大將

軍凡有大征討率以五府

中軍左軍右軍前軍後軍為五府每府有左右都督都督

同知都督僉事

都督及公侯伯充大將軍蓋隋以前之大將軍

其位或在三司上或次三司下或與大司馬同秩兼理

政事故置掾屬唐以後或為環衛官或為武臣散階之
官或為儀衛扈從之官不開府無掾屬明徐達雖特拜
大將軍禮數雖異然亦統軍馬專征討而已亦不設掾
屬

車騎將軍

車騎將軍唐已無之宋遼金元明皆無

前後左右將軍

前後左右將軍唐已無之宋遼金元皆無明總兵掛印

稱將軍者

明制總兵官副總兵參將遊擊將軍守備把總無品級無定員總鎮一方者為鎮守獨鎮

一路者為分守各守一城一堡者為守備與主將同守一城者為協守又有提督提調巡視備禦領班備倭等

名凡總兵副總兵率以公侯伯都督充之大同曰征西前將軍遼東曰征東

前將軍皆外鎮之銜名亦非唐以前之前後左右將軍也

四征將軍

四征將軍

征東征西征南征北號為四征

唐已無之宋遼金元皆無之

明總兵掛印稱將軍者雲南曰征南將軍

太祖洪武中命顧川侯傅

友德為征南將軍率三十萬眾征雲南遂城烏撒得七
星關以通罪節又克可渡河於是東川烏蒙芒部諸蠻
望風降附又廖永忠克征南將軍率舟師取兩廣永忠
自福州遣人諭何真真以廣循惠降破邵宗愚山寨獲
宗愚等諸郡相繼降檄諭九真日南朱崖儋耳三十餘
城皆納印請吏又顧竅為征南將軍鎮貴州征五開六
洞一百三十七寨悉平又沐璘為征南將軍由副指
揮陞右都督充總兵官掛將軍印繼沐琮鎮守雲南大
同曰征西前將軍寧夏曰征西將軍
陳懋佩征西將軍
印為總兵鎮守寧
夏賜寶鑑白紵牛羊以為戒嚴之費懋至鎮號令一新
凡降附者撫綏之務得其歡心又周尚文拜征西將軍
鎮守寧夏歷鎮山西延綏俱有戰功鎮大同條
上禦敵四十餘事修補牆堡七百里墾田五萬

四鎮將軍

四鎮將軍

鎮東鎮西鎮南鎮北謂之四鎮

唐時已無宋遼金元皆無之

明掛印總兵官稱將軍者宣府曰鎮朔將軍延綏曰鎮

西將軍

其稱鎮守而不加將軍銜者鎮守薊州總兵官一人穆宗隆慶二年改為總理練兵事務兼鎮

守駐三屯營協守副總兵三人鎮守遼東總兵官一人舊設駐廣寧隆慶元年令冬月移駐河東遼陽適中之

地調度防禦應援海州瀋陽協守副總兵一人鎮守保定總兵官一人孝宗弘治十八年初設保定副總兵後

改為參將武宗正德九年復為分守副總兵世宗嘉靖二十年改為鎮守三十年改設鎮守總兵官神宗萬曆

元年令春秋兩防移駐浮圖峪遇有警移駐紫荆關以備入援鎮守宣府總兵官一人協守副總兵一人鎮守

大同總兵官一人協守副總兵一人鎮守山西總兵官一人嘉靖二十年改設駐寧武關防秋移駐陽方口防

冬移駐偏關協守副總兵一人鎮守延綏總兵官一人
協守副總兵一人鎮守寧夏總兵官一人協守副總兵
一人鎮守甘肅總兵官一人協守副總兵一人分守副
總兵一人鎮守陝西總兵官一人舊駐會城後移駐固
原分守副總兵一人鎮守四川總兵官一人隆慶五年
添設駐建武所分守副總兵一人鎮守雲南總兵官一
人鎮守貴州總兵官一人嘉靖三十二年加提督麻陽
等處地方職銜駐銅仁府鎮守湖廣總兵官一人鎮守
廣西總兵官一人鎮守廣東總兵官一人舊為征蠻將
軍兩廣總兵官嘉靖四十五年分設駐潮州府協守副
總兵一人提督狼山副總兵一人鎮守浙江總兵官一
人鎮守福建總兵官一人鎮守山東總兵官一人共同
為鎮守總兵而不稱
將軍者皆非掛印也

四安將軍

四安將軍

安東安西安南
安北謂之四安

唐時已無宋遼金元明皆無

四平將軍

四平將軍

平東平西平南
平北謂之四平

唐宋遼皆無金泰和六年伐

宋權設平南撫軍上將軍平南冠軍大將軍平南龍驤

將軍平南虎威將軍平南溫江將軍軍還即罷元不設

明總兵掛印稱將軍者湖廣曰平蠻將軍甘肅曰平羌

將軍

雜號將軍

五押招討

遼西南面有五押招討大將軍

冠軍

龍驤

虎威

盪江

皆金泰和六年所設

領軍

夾輅

殿前

殿外

皆元時設為儀衛扈從官佐

擊

遊擊

皆明設佐擊唯京營有之遊擊各總兵下皆有

大漢

扈從之官屬錦衣衛

平邊

王越為平邊將軍

監軍

軍師祭酒

理曹掾屬附

唐開元後監軍之職多以中官為之宋不設遼北面官北院都統軍司有北院統軍都監北院詳衮司有北院都監南院亦如之近侍詳衮司有近侍都監四帳都詳

衮司

掌四帳軍馬之事

有都監其部族節度使司下有某部族

都監北面軍官大詳衮司有都監諸部署有兵馬都監

諸指揮使有某軍都監北面行軍官行軍都統所有監

軍有行軍諸部都監有監戰南面官諸指揮使司下有

某軍都監金太宗天會二年置都元帥府有元帥左監

軍一人元帥右監軍一人左都監一人右都監一人元

不設明以監察御史為監軍亦以宦官為監軍不常設

無定員

軍師祭酒理曹掾屬唐時無宋遼金元明皆無

三署郎官叙

三署郎官漢時所置唐之各左右翊中郎府悉屬各衛
遇將軍缺則以中郎將代其職掌亦為上將軍大將軍
將軍之貳大率皆供奉儀衛宿直巡警之事宋各衛中
郎將郎將皆為環衛其皇城司亦以副使為中郎將使
臣為左右郎將較環衛又稍有職掌若金之殄冠中郎
將殄冠郎將專掌兵戎之官暫為武臣之階軍罷即廢

更非常職自唐以後皆為武官要非前代之三署郎官員額多而率遷他職者可比也

中郎將

五官中郎將

左右中郎將

中郎將至唐時皆屬十六衛中無五官中郎將及特設左右中郎將其親衛五府中郎將已附左右衛篇中其左右驍衛左右翊中郎將府中郎將各一人左郎將一人右郎將一人左右武衛左中翊中郎將府中郎將各一人左郎將一人右郎將一人左右威衛左右翊中郎

將府中郎將各一人左郎將一人右郎將一人左右領
軍衛左右翊中郎將府中郎將各一人左郎將一人右
郎將一人左右金吾衛左右翊中郎將府中郎將各一
人左郎將一人右郎將一人其中郎將掌領府屬督京
城左右六街鋪巡警以果毅二人助巡探入閣日中郎
將一人升殿受狀衛士六百為大角手六番閱習吹大
角為昏明之節諸營壘候以進退左右監門衛左右翊
中郎將府中郎將掌涖宮殿城門皆左入右出中郎將

各四人左右千牛衛中郎將府中郎將掌供奉侍衛凡
千牛及備身左右以御刀仗升殿供奉者皆上將軍領
之中郎將佐其職有口敕通事舍人承傳聲不下聞者
中郎將宣告左右羽林軍左右翊中郎將府中郎將一
人左右中郎將一人左右郎將一人宋環衛官左右金
吾衛有中郎將郎將左右衛有中郎將郎將左右千牛
衛有中郎將郎將徽宗政和五年詔皇城司

所掌詳載
左右金吾

衛可弼置親從第五指揮以七百人為額使為將軍副

使為中郎將使臣以下為左右郎將金元中郎將郎將
為儀衛扈從之官遼明不設

虎賁中郎將

虎賁中郎將唐時已無宋遼金元明皆無

四中郎將

四中郎將漢時東西南北各置中郎將唐時已無宋遼
金元明皆無

雜中郎將

唐宋遼皆無金泰和六年伐宋置珍寇中郎將珍寇郎將又有內供奉郎將

儀衛扈從之官

元明皆無

折衝府

果毅別將等附

唐制諸衛折衝都尉府每府折衝都尉一人左右果毅都尉各一人折衝都尉掌領屬備宿衛師役則總戎具資糧左右果毅都尉掌貳都尉宋不設遼各衛皆有折衝都尉果毅都尉金泰和六年伐宋置珍寇折衝都尉珍寇果毅都尉又有折衝果毅都尉內果毅都尉折衝

都尉皆為儀衛扈從之官元折衝都尉果毅都尉金吾折衝金吾果毅亦皆儀衛扈從之官明不設

三都尉

奉車

駙馬

騎

奉朝請附

唐制奉車都尉掌馭副車有其名而無其人大陳設則他官攝駙馬都尉無定員皆尚主者為之秩與奉車都尉同五品上騎都尉騎都尉皆為勲官宋無奉車都尉有駙馬都尉其上騎都尉騎都尉為勲官駙馬都尉班在上騎都尉之下與騎都尉同其朝請大夫朝請郎為

文散官遼北面官有駙馬都尉府駙馬都尉掌公主帳宅之事無奉車都尉騎都尉金駙馬都尉秩正四品其上騎都尉騎都尉亦為勲官無奉車都尉元尚主者皆稱駙馬都尉封王爵其上騎都尉騎都尉亦為勲官無奉車都尉明亦無奉車都尉其駙馬都尉位在伯上凡尚大長公主長公主公主並曰駙馬都尉惠成之間駙馬都尉有典兵出鎮及掌府部事者

惠帝建文時梅殷為鎮守淮安總兵

官李堅為左副將軍成祖永樂時李讓掌北京行部其事以後沐昕宋琥並守備南京趙輝掌南京左府事其

餘唯奉祀孝陵攝行廟祭署宗人府事往往一充其上
騎都尉騎都尉並為武臣之勲官凡功臣及外戚之封
公侯伯者有流有世其才而賢者充官營總督五軍都
督府掌僉書南京守備或出充鎮守總兵官否則食祿
奉朝請而已

欽定續通典卷三十三